

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

TINDAKAN PENGUATKUASAAN KPDNHEP DALAM MEMBANTERAS KETIRISAN MINYAK MASAK BERSUBSIDI

PUTRAJAYA, 31 Mac 2022 – Kementerian Perdagangan Dalam Negeri dan Hal Ehwal Pengguna (KPDNHEP) sentiasa komited di dalam memastikan isu penyelewengan minyak masak bersubsidi yang berlaku di dalam Negara dapat diatasi dengan lebih tegas dan efektif. Tindakan pemeriksaan dan pemantauan yang lebih menyeluruh sentiasa dilakukan termasuklah ke atas semua syarikat pembungkusan minyak masak dan kilang penapis minyak masak di bawah Program Skim Penstabilan Harga Minyak Masak (COSS).

2. Di dalam menangani isu penyelewengan dan ketirisan minyak masak bersubsidi ini, KPDNHEP telah melaksanakan operasi khas iaitu OPS GORENG yang bertujuan untuk melakukan pemantauan khusus ke atas syarikat pembungkus, pemborong dan peruncit minyak masak di bawah COSS.

3. Berdasarkan statistik bagi tempoh Januari 2018 sehingga Februari 2022, **sebanyak 401 kes membabitkan kesalahan berkaitan pembekalan minyak masak** termasuklah minyak masak bersubsidi telah diambil oleh pihak Kementerian melibatkan nilai rampasan berjumlah RM15.57 juta. Kes-kes ini telah dihasilkan hasil tindakan penguatkuasaan ke atas pelbagai peringkat rantai pengedaran termasuklah pengilang, pemborong dan

peruncit yang disyaki melakukan pelbagai kesalahan di bawah Akta Kawalan Bekalan 1961 dan peraturan-peraturan di bawahnya.

4. Selain itu, sebanyak sembilan (9) kertas siasatan telah dibuka di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) (Akta 613) melibatkan nilai pembekuan ke atas aset syarikat berkaitan minyak masak yang telah diambil tindakan berjumlah RM1.79 juta.

5. Kementerian juga telah mengambil tindakan tegas dengan menggantung sementara lesen berkaitan barang kawalan di bawah Akta Kawalan Bekalan 1961 (CSA) dan penggantungan kuota minyak masak bersubsidi oleh syarikat yang terlibat sehingga siasatan selesai dijalankan dan keputusan kes dimuktamadkan. Berdasarkan statistik sehingga Februari 2022, sebanyak 27 syarikat telah digantung/dibatalkan lesen di bawah Akta Kawalan Bekalan 1961.

6. KPDNHEP memandang serius isu berkaitan penyelewengan dan ketirisan minyak masak bersubsidi dan ingin menegaskan bahawa Kementerian tidak akan berkompromi dengan mana-mana pihak yang didapati terlibat dalam penyelewengan dan aktiviti haram khususnya berkaitan minyak masak bersubsidi.

7. Susulan pembukaan sempadan Negara yang diumumkan Kerajaan mulai 1 April 2022 ini, KPDNHEP akan mempertingkatkan tindakan

penguatkuasaan dipintu masuk sempadan dengan kerjasama agensi-agensi berkaitan seperti Polis DiRaja Malaysia (PDRM), Angkatan Tentera Malaysia (ATM), Jabatan Kastam DiRaja Malaysia (JKDM), Agensi Penguatkuasaan Maritim Malaysia (APMM) dan Jabatan Imigresen Malaysia (JIM) untuk memastikan isu-isu berkaitan ketirisan barang kawalan termasuk minyak masak bersubsidi dibanteras sepenuhnya.

8. Masyarakat disaran untuk menjadi mata dan telinga kepada pihak berkuasa dengan memberikan kerjasama sekiranya mempunyai sebarang maklumat berhubung aktiviti penyelewengan barang kawalan dan bersubsidi terutamanya minyak masak bagi memastikan aktiviti haram ini dapat dibanteras sehingga ke akar umbi kerana boleh mendatangkan kesan yang buruk kepada rakyat dan Negara.

9. Orang ramai yang mempunyai sebarang maklumat berhubung penyelewengan barang kawalan dan bersubsidi ini boleh mengemukakan aduan yang lengkap kepada pihak Kementerian melalui saluran aduan berikut:

- i. WhatsApp 019-279 4317
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

YB Dato Sri Alexander Nanta Linggi

Menteri Perdagangan Dalam Negeri
dan Hal Ehwal Pengguna

PUTRAJAYA,

31 Mac 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

